



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

ODLUKA
O USLOVIMA I POSTUPKU PRIHVATANJA POKROVITELJSTVA
GRADA SARAJEVA
(Prijedlog)

Predlagač: Gradonačelnik
Obrađivač: Stručna služba za poslove kabineta
i poslove Gradske uprave

Sarajevo, decembar 2024. godine

Adresa: Hamdije Kreševljakovića 3
71 000 Sarajevo
Tel.: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo”, broj 7/23), Gradsko vijeće Grada Sarajeva, na ___ sjednici održanoj dana __. __. 2024. godine, donijelo je:

(Prijedlog)

**ODLUKU
O USLOVIMA I POSTUPKU PRIHVATANJA POKROVITELJSTVA
GRADA SARAJEVA**

Član 1.

(Predmet Odluke)

Ovom odlukom uređuju se uslovi, postupak i način prihvatanja pokroviteljstva Grada Sarajeva (u daljnjem tekstu: pokroviteljstvo), nad društvenim, naučnim, kulturnim, sportskim ili drugim manifestacijama, priredbama, skupovima i drugim projektima od značaja za grad Sarajevo, kao oblika promoviranja njegovih interesa, čiji su organizatori pravna lica.

Član 2.

(Vrste pokroviteljstva i nadležnost za odlučivanje)

- (1) Pokroviteljstvo je način na koji se Grad Sarajevo povezuje sa odabranim brojem događaja koja ispunjavaju uslove potrebne kako bi se među građanima, u medijima i civilnom društvu povećao interes javnosti za aktivnosti organizatora događanja i aktivnosti Grada Sarajeva, te kako bi se povećala vidljivost tih aktivnosti.
- (2) Grad Sarajevo može prihvatiti počasno pokroviteljstvo, kao i pokroviteljstvo finansijske prirode.
- (3) Gradonačelnik/ca Grada Sarajeva (u daljnjem tekstu: gradonačelnik/ca) donosi odluke, o prihvatanju počasnog pokroviteljstva.
- (4) Gradonačelnik/ca Grada Sarajeva donosi odluke, odnosno zaključuje ugovore o prihvatanju pokroviteljstva uz finansijske obaveze Grada Sarajeva do 25.000,00 KM.
- (5) Gradsko vijeće Grada Sarajeva (u daljnjem tekstu: Gradsko vijeće) donosi odluke o prihvatanju pokroviteljstva uz finansijske obaveze Grada Sarajeva u iznosima većim od 25.000,00 KM.

Član 3.

(Podnošenje prijave)

- (1) Pokroviteljstva koja zahtijevaju finansijska sredstva realizira se putem javnog poziva koji raspisuje gradonačelnik/ca Grada Sarajeva putem nadležne Gradske službe na početku svake kalendarske godine i ostaje otvoren do utroška planiranih budžetskih sredstava.
- (2) Na javni poziv iz stava (1) ovog člana mogu se prijaviti pravna lica koja nisu registrovana za ostvarivanje profita (udruženja, fondacije, i sl.) – organizatori društvenih, naučnih, kulturnih, sportskih ili drugih manifestacija, priredbi, skupova i drugih projekata koja su od značaja za Grad Sarajevo.
- (3) Prijava na javni poziv iz stava (1) ovog člana dostavlja se Komisiji za pregled i ocjenu pristiglih prijava na javni poziv u pisanoj formi, sa svim potrebnim podacima o podnosiocu prijave, te podacima o događaju (priredbi, manifestaciji) ili projektu za koji se podnosi prijava, uz kompletnu dokumentaciju.

Član 4.
(Kriteriji za prihvatanje pokroviteljstva)

(1) Opći kriteriji su:

1. registracija pravnog lica sa djelovanjem na području Grada Sarajeva za obavljanje i organiziranje manifestacija i projekata iz člana 1. ove odluke, i to: izvod Rješenja o upisu u registar nadležnog suda, registar nadležnog državnog, federalnog, kantonalnog ili drugog nadležnog organa i aktuelni izvadak iz Registra ne stariji od 6 mjeseci.
2. identifikacioni broj za pravno lice i broj transakcijskog računa u poslovnoj banci;
3. obezbijeđeni tehnički uslovi za realizaciju planirane aktivnosti;
4. obezbijeđeni ljudski i materijalni resursi neophodni za realizaciju planiranih aktivnosti;
5. dostavljen finansijski izvještaj za prethodnu godinu, ako su korištena sredstva iz Budžeta Grada Sarajeva;
6. dostavljen plan aktivnosti sa naznačenom konstrukcijom finansiranja.

(2) Posebni kriteriji su:

1. značaj programa – projekta za Grad Sarajevo međuopćinsku ili međugradsku saradnju;
2. stupanj doprinosa afirmaciji Grada Sarajeva i BiH;
3. interes građana grada Sarajeva;
4. programi – projekti koji doprinose jačanju tolerancije i razvoju demokratskog društva;
5. afirmacija bosanskohercegovačkog identiteta i tradicionalnih bosanskohercegovačkih vrijednosti;
6. značaj ponuđenog programa koji se odnosi na organiziranje stručnih i naučnih skupova;
7. mogućnost uključivanja u internacionalne programe kojima je cilj afirmacija Grada Sarajeva, kao regionalnog, kulturnog i privrednog centra.

(3) Korisnici sredstava dužni su dostaviti izvještaj o namjenskom utrošku sredstava doznačenih iz Budžeta Grada Sarajeva u roku od 30 dana od dana realizacije manifestacije/projekta sa odgovarajućom dokumentacijom.

(4) Nadzor nad utroškom finansijskih sredstava vrši gradonačelnik/ca Grada Sarajeva putem nadležne službe.

Član 5.
(Postupak odlučivanja)

- (1) Podnesenu prijavu iz člana 3. ove odluke razmatra Komisija za pregled i ocjenu pristiglih prijava na javni poziv te (procjenjuje) opravdanost podnesene prijave, prvenstveno sa stanovišta značaja za Grad Sarajevo, odnosno sa stanovišta promoviranja njegovih interesa, a sve u skladu sa ovom odlukom i objavljenim Javnim pozivom koji raspisuje gradonačelnik/ca Grada Sarajeva putem nadležne službe.
- (2) Komisiju iz stava (1) ovog člana imenuje gradonačelnik/ca Grada Sarajeva posebnim Rješenjem.
- (3) Prijedlog, sa svojim stavovima i mišljenjima, Komisija upućuje gradonačelniku/ci Grada Sarajeva na razmatranje i konačno odlučivanje, u slučajevima propisanim u članu 2. stav (4) ove odluke.
- (4) U slučajevima propisanim u članu 2. stav (5) ove odluke, prijedlog, gradonačelnik/ca Grada Sarajeva, kao predlagач, dostavlja Gradskom vijeću Grada Sarajeva na razmatranje i konačno odlučivanje.

Član 6.

(Obavještenje podnosiocu prijave)

O konačnoj odluci Gradskog vijeća, odnosno gradonačelnika/ce, Služba obavještava podnosioca prijave.

Član 7.

(Praćenje realizacije i obezbjeđivanje sredstava)

- (1) O realizaciji ugovora i odluka iz člana 2. ove odluke, brine gradonačelnik/ca, putem nadležne gradske službi Grada Sarajeva i o tome redovno izvještava Gradsko vijeće.
- (2) Sredstva za realizaciju pokroviteljstva finansijske prirode obezbjeđuju se u Budžetu Grada Sarajeva.

Član 8.

(Obaveze organizatora pokroviteljstva)

- (1) Ukoliko Grad Sarajevo prihvati pokroviteljstvo, organizator je obavezan tokom trajanja događaja istaknuti naziv i vizuelni identitet Grada Sarajeva kao pokrovitelja.
- (2) Prihvatanjem pokroviteljstva, Grad Sarajevo ne preuzima organizacijske obaveze.

Član 9.

(Raspisivanje javnog poziva)

Na početku kalendarske godine gradonačelnik/ca je dužan/na, raspisati i objaviti javni poziv za prihvatanje pokroviteljstva Grada Sarajeva.

Član 10.

(Postupak izmjena i dopuna)

Izmjene i dopune Odluke vrše se na način i po postupku za njeno donošenje.

Član 11.

(Prestanak važenja)

Stupanjem na snagu ove odluke prestaje da važi Odluka o uslovima i postupku prihvatanja pokroviteljstva Grada Sarajeva („Službene novine Kantona Sarajevo“, broj 05/06).

Član 12.

(Stupanje na snagu)

Odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:

Sarajevo, __. __.2024. godine

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 31. stav (1) tačka b) Statuta Grada Sarajeva kojim je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje.

RAZLOZI DONOŠENJA

Gradsko vijeće Grada Sarajeva, na sjednici održanoj dana 31. januara 2006. godine, donijelo je Odluku o uslovima i postupku prihvatanja pokroviteljstva Grada Sarajeva („Službene novine Kantona Sarajevo“, broj 5/06). Odlukom o uslovima i postupku prihvatanja pokroviteljstva Grada Sarajeva uređeni su uslovi, postupak i način prihvatanja pokroviteljstva Grada Sarajeva nad društvenim, naučnim, kulturnim, sportskim i drugim manifestacijama, priredbama i skupovima od značaja za Grad Sarajevo. U članu 2. naprijed navedene Odluke definirano je da gradonačelnik/ca donosi odluke o prihvatanju pokroviteljstva uz finansijske obaveze Grada Sarajeva do 25.000,00 KM, kao i da Gradsko vijeće donosi odluke o prihvatanju pokroviteljstva uz finansijske obaveze Grada Sarajeva u iznosima većim od 25.000,00 KM.

Naime, Federalno ministarstvo finansija donijelo je Smjernice o minimalnim standardima dodjele budžetskih sredstava putem transfera i subvencija u Federaciji BiH („Službene novine F BiH“, broj 37/24), kojim je, između ostaloga, u predmetu istih propisalo da se Smjernice primjenjuju na federalne institucije, kantone, jedinice lokalne samouprave i druga pravna lica kada iz javnih sredstava dodjeljuju sredstava putem transfera i subvencija za finansiranje programa ili projekata drugim nivoima vlasti, neprofitnim organizacijama ili pojedincima, ako drugim propisom nije drugačije uređeno.

Obzirom da su Smjernice o minimalnim standardima dodjele budžetskih sredstava putem transfera i subvencija u Federaciji Bosne i Hercegovine odredile postupke dodjele budžetskih sredstava, te obavezu raspisivanja javnog poziva, kao i izuzeća od dodjele budžetskih sredstava putem javnog poziva, Prijedlog Odluke koji je upućen Gradskom vijeću na razmatranje i odlučivanje korigiran je u djelu koji se odnosi na postupak podnošenja prijave i postupak odlučivanja, odnosno procjene opravdanosti podnesenog prijedloga, te će se ubuduće Pokroviteljstva koja zahtijevaju finansijska sredstva realizirati putem javnog poziva, a podneseni zahtjev cijeniti će Komisija za pregled i ocjenu pristiglih prijava na javni poziv, a sve u skladu sa ovom Odlukom i Javnim Pozivom.

Kako će se sredstva utvrđena u Budžetu Grada Sarajeva za 2025. godinu na ekonomskom kodu 614300 – Primjena Odluke o uslovima i postupku prihvatanja pokroviteljstva Grada Sarajeva, realizirati u skladu sa Javnim pozivom i Odlukom o uslovima i postupku prihvaćanja pokroviteljstva Grada Sarajeva koji bliže uređuje ovu oblast, te donošenjem Odluke/Ugovora o odobravanju novčanih sredstava, kao i da su pojedine procedure jasnije definirane i precizirane, to se i pristupilo sačinjavanju prijedloga predmetnog akta.

Uvažavajući naprijed navedeno, Prijedlog Odluke o uslovima i postupku prihvatanja pokroviteljstva Grada Sarajeva dostavlja se Gradskom vijeću Grada Sarajeva na razmatranje i odlučivanje.

FINANSIJSKA SREDSTVA

Za realizaciju ove odluke obezbjeđena su sredstva u Budžetu Grada Sarajeva.